

重刊道藏輯要

太上玄靈北斗本命延生真經

開經玄蘊咒

寂寂至無宗

虛峙劫仞阿

豁落洞玄文

誰測此幽遐

一入大乘路

孰計年劫多

不生亦不滅

欲生因蓮花

超凌三界途

慈心解世羅

真人無上德

世世爲仙家

爾時

太上老君以永壽元年正月七日在太清境上太極宮中觀見  
眾生億劫漂沉周迴生死或居人道生在中華或生夷狄之中

或生蠻戎之內或富或貴或賤或貧暫假因緣墮於地獄爲無  
定故罪業牽纏魂繫陰司受苦滿足人道將違生居畜獸之中  
或生禽蟲之屬轉乖人道難復人身如此沉淪不知自覺爲先  
世迷真之故受此輪迴乃以哀憫之心分身教化化身下降至  
於蜀都地神湧出扶一玉局而作高座於是

老君昇玉局坐授與天師北斗本命經訣廣宣要法普濟眾生  
是時

老君告天師曰人身難得中土難生假使得生正法難遇多迷  
真道多入邪宗多種罪根多肆巧詐多恣淫殺多好群情多縱  
貪嗔多沉地獄多失人身如此等緣眾生不悟不知正道迷惑

者多我今哀見此等眾生故垂教法爲說良緣令使知道知身性命皆憑道生了悟此因長生人道種子不絕世世爲人不生無道之鄉不斷人之根本更能心修正道漸入仙宗永離輪迴超昇成道我故示汝妙法令度天民歸真知命可以本命之日修齋設醮啟祝北斗三官五帝九府四司薦福消災奏章懇願虔誠獻禮種種香花時新五果隨世威儀清淨壇宇法天象地或於觀宇或在家庭隨力建功請行法事功德深重不可具陳念此

大聖北斗七元真君名號當得罪業消除災愆洗蕩福壽資命善果臻身凡有急難可以焚香誦經尅期安泰於是

大聖北斗解厄應驗曰

大聖北斗七元君

能解三災厄

大聖北斗七元君

能解四殺厄

大聖北斗七元君

能解五行厄

大聖北斗七元君

能解六害厄

大聖北斗七元君

能解七傷厄

大聖北斗七元君

能解八難厄

大聖北斗七元君

能解九星厄

大聖北斗七元君

能解夫妻厄

大聖北斗七元君

能解男女厄

大聖北斗七元君

能解產生厄

大聖北斗七元君

能解復連厄

大聖北斗七元君

能解疫癘厄

大聖北斗七元君

能解疾病厄

大聖北斗七元君

能解精邪厄

大聖北斗七元君

能解虎狼厄

大聖北斗七元君

能解蟲蛇厄

大聖北斗七元君

能解劫賊厄

大聖北斗七元君

能解枷棒厄

大聖北斗七元君

能解橫死厄



大聖北斗七元君

能解咒誓厄

大聖北斗七元君

能解天羅厄

大聖北斗七元君

能解地網厄

大聖北斗七元君

能解刀兵厄

大聖北斗七元君

能解水火厄

於是七元君

大聖善通靈

濟度諸厄難

超出苦眾生

若有急告者

持誦保安平

盡憑生百福

咸契於五行

三魂得安健

邪魅不能停

五方降真炁

萬福自來并

長生超八難

皆由奉七星

生生身自在

世世保神清

善似光中影

應如谷裏聲

三元神共護

萬聖眼同明

無災亦無障

永保道心甯

老君曰北辰垂象而眾星拱之爲造化之樞機作人神之主宰  
宣威三界統御萬靈判人間善惡之期司陰府是非之目五行  
共稟七政同科有迴死注生之功有消災度厄之力上至

帝王下及庶人尊卑雖則殊途命分俱無差別凡夫在世迷謬  
者多不知身屬

北斗命由天府有災有患不知解謝之門祈福祈生莫曉歸依  
之路致使魂神被繫禍患來纏或重病不痊或邪妖尅害連年

困篤累歲連遭塚訟徵呼先亡復連或上天譴責或下鬼訴誣  
若以此危厄如何救解急須投告

北斗醮謝真君及轉真經認本命真君方獲安泰以至康榮更  
有深妙不可盡述凡見

北斗真形頂禮恭敬

北斗第一陽明貪狼太星君子生人屬之

北斗第二陰精巨門元星君丑亥生人屬之

北斗第三真人祿存貞星君寅戌生人屬之

北斗第四立冥文曲紐星君卯酉生人屬之

北斗第五丹元廉貞罡星君辰申生人屬之



北斗第六北極武曲紀星君己未生人屬之

北斗第七天關破軍關星君壬生人屬之

北斗第八洞明外輔星君

北斗第九隱光內弼星君

上臺虛精開德真君

中臺六淳司空星君

下臺曲生司祿星君

如是眞君名號不可得聞凡有見聞能持念者皆道心深重宿  
有善緣得聞持誦其功德力莫可稱量若正信男女值此眞經  
智慧性圓道心開發出羣迷逕入希夷門歸奉眞宗達生榮界

於三元八節本命生辰北斗下日嚴置壇場轉經齋醮依儀行道其福無邊世世生生不違真性不入邪見持經之人常持誦七元真君所屬尊號善功圓滿亦降吉祥卽說北斗咒曰

北斗九辰

中天大神

上朝金闕

下覆崑崙

調理綱紀

統制乾坤

大魁貪狼

巨門祿存

文曲廉貞

武曲破軍

高上玉皇

紫微帝君

大周天界

細入微塵

何災不滅

何福不臻

元皇正炁

來合我身

天罡所指

晝夜常輪

俗居小人

好道求靈

願見尊儀

永保長生

三台虛精

六淳曲生

生我養我

護我身形

魁魍魎魍魎魍魎

尊帝急急如律令

老君曰凡人性命五體悉屬本命星官之所主掌本命神將本宿星官常垂蔭祐主持人命使保天年凡俗無知終身不悟夫本命星官每歲六度降在人間降日爲本命限期有南陵使者三千人北斗真君七千神將本命真官降駕眾真悉來擁護可以消災懺罪請福延生隨力章醮福德增崇其有本命限期將至自身不知不設齋醮不修香火此爲輕生迷本不貴人身天司奪祿減算除年多致天喪迷誤之者雖遇經訣懷不信心毀謗真文如此之人身謝之後淪沒三塗漂沉諸趣永失人身深可悲哀自致斯苦若本命之日能修齋醮善達天司一世於本

命限期開轉真經廣陳供養使三生常爲男子身富貴聰明人  
中殊勝其有生身果薄雖在人中貧窮下賤縱知本命無力修  
崇能酌水獻花冥心望北極稽首禮拜念本命真君名號者亦  
不虛過本命限期皆得延生注福繫係人身災厄蠲除獲福無  
量天師歡喜踴躍作禮讚歎難可得遇無上法橋

老君重告天師曰世人罪福善惡皆屬天司懺罪消災莫越修  
奉遇本命生辰告身中元辰驛馬削落三災九厄保見今眷屬  
安甯凡有上士於本命生辰持此真文者外伏魔精內安真性  
功霑水陸善及存亡悔過虔恭漸登妙果重立立功證虛無道  
乃得聖智圓通隱顯莫測出有人無道遙雲際昇入金門與聖

合真身迴三界永不輪轉壽量無窮快樂自在凡有男女於本命生辰及諸齋日清淨身心焚香持此真文自認北極本命所屬星君隨心禱祝善無不應災罪消除致感萬聖千真俱來衛護此文所在之處千真敬禮萬聖護持魔鬼潛消精靈伏匿世有災殃悉皆消滅是名北斗本命延生經訣乃修真之徑路得道消遙皆因此經證聖成真皆因此經出離生死皆因此經保護男女皆因此經保命延年皆得自在永爲身寶福壽可稱保而敬之非人勿示

老君說經將畢龍鶴天仙來迎還於玉京是時天師受得妙法而作是言誓願流行以傳善士若有男女受持讀誦我當與十



戒仙官所在擁護於是再拜

老君而說贊曰

家有北斗經 本命降真靈 家有北斗經 宅舍得安甯

家有北斗經 父母保長生 家有北斗經 諸獸化爲塵

家有北斗經 萬邪自歸正 家有北斗經 營業得稱情

家有北斗經 闔門自康健 家有北斗經 子孫保榮盛

家有北斗經 五路自通達 家有北斗經 眾惡永消滅

家有北斗經 六畜保興生 家有北斗經 疾病得痊癒

家有北斗經 財物不虛耗 家有北斗經 橫事永不起

家有北斗經 長保亨利貞

老君曰善哉善哉汝可宣揚正教福利無邊普及眾生永霑勝  
善天師稽首禮謝信受奉行

太上玄靈北斗本命延生真經

太上說南斗六司延壽度人妙經

爾時老君告天師曰此經乃九天八會之真文三洞三清之上道

元始天尊昔經歷於七億萬劫天地始終人倫生死五運遷變萬彙興衰而

天尊於今猶宴居景雲之上上清之境修鍊至真敷揚妙道愍念羣生大慈不捨吾昔得傳付是經今當授之於汝汝宜選奉道之士謹修行之人天陽地陰一合而生成兩曜兩曜行度五緯周天是謂七政則七星九元北斗也每以杓隨月建分指節氣二十四氣二十八舍應下土七十二候三十六禽舍中有斗

宿六星是則號南斗六司與北斗七政分職共理三才六合八卦九宮總轄中外百辟官品乃紫微太微兩極都曹也上係十二分次天真靈神下統十二分野地祇主者四瀆五嶽九州八紘名山大川城隍社廟中及人民羣類萬物無不計係其簿籍掌握世人善惡矣北斗位處坎宮名同月曜降神於人名之爲魄也主司陰府宰御水源將濟生聚功莫大焉南斗位處離宮名同日曜降神於人名之爲魂也主司陽官宰御火帝將濟動用德莫大焉洎有天地迄至於今二司兩極同共陶鑄萬品生成萬物注擬天人之爵秩增減士庶之祿俸延保年齡去留災福莫不由其與奪也所以然者乃知陽日陰月南北二司魁斗



魑罡受性水火稟質陰陽助天地而育物體道德而垂光物得而豐也非此而孰能乎人得而生也非此而孰爲乎是故

天尊殷勤嗟憫觀爾含靈一如赤子闡教救護令保生性其救護法使一切善男善女不以高卑皆應志心常當恭敬若或時觀日曜月曜南斗北斗則鄭重叩頭請乞祐護願賜恩福上言呼稱至聖至尊真宰真君矜哀凡冗宥赦過咎卽再拜不得懷於輕慢反招殃累

老君曰爾等男女能依吾所授奉教而行者若有所告請欲消災度厄增福延年保家屬之團圓祝封疆之甯謐或欲免息塚訟削死注生皆當上章投詞設醮求請無不如意也爾時

老君爲天師重宣言曰

南斗火官除毒害

北斗水神滅凶災

一切所求皆稱遂

萬般滯悶悉通開

能依經法冥心醮

必當隨願契靈臺

凡在有情常頂禮

禍厄無因輒敢來

老君曰神真之妙凡世難言凡夫愚昧貴遠賤近近者身也目見日月星斗耳聞風雷韶雅鼻嗅蘭麝腥臊舌了甘辛酸苦口宣言語音響至於手執足行自生及老皆不可離水火今凡夫見之若不見聞其言如甚瞶殊不知成立生性皆是天地日月星斗與之假如四大正茲一氣生生之生全繫水火水火比於

道之真體故不可暫離可離而獲存者非物非人吾今叮囑與在世男女說此要道普令發心求請醮獻知有神真信吾教示更能於四時月旦八節十二氣三元三會五臘本命是諸良時吉日皆可上章拜表投詞獻欸請乞恩福懺罪消災然燈獻果供養禮拜其福無量也

南斗第一天府司命上相鎮國真君

南斗第二天相司錄上相鎮嶽真君

南斗第三天梁延壽保命真君

南斗第四天同益算保生真君

南斗第五天樞度厄文昌鍊魂真君

南斗第六天機上生監簿大理真君

如是六星真君六星童子火鈴將軍凡人轉誦此經切須至誠  
虔心禱祝無不應驗唯在精勤拜表上章真聖自降必獲延年  
長生道性

老君曰此六司真君神性急速能傾心求請無願不從神真感  
人心隨事皆諧偶也夫萬行之本一身之根在乎道氣保固形  
命形命保固在乎教法教法存乎科儀之細密聲發響應形動  
影隨形從心移發足動步神靈微妙也南斗北斗陶魂鑄魄魂  
既受鍊乃遷轉生人能依吾教法謝已往之非補將來之短洗  
滌眾災拜迎百福唯在嚴潔崇敬罄志投誠必獲度世之僊道

共日月之同年若有深信之士能修設兩極二斗同醮一壇各  
像斗星立壇炷列香燈鋪排淨茶供獻果食香花淨水糖餅油餅  
荷蒸乳蒸煎洗棗湯細茶不須酒脯此最爲要道以斯迎請神真  
真聖歡喜降臨速得賜其福祐

老君演此真妙經竟正一天師與弟子王長座前再拜禮謝謹  
奉

道旨廣爲傳行





太上說東斗主算護命妙經

老君告正一天師曰天道冥運文象玄應昭而不言經星常宿  
中外官品各有司主凡一百一十八名積數七百八十二星二  
十八宿兩曜五星皆在璇璣以齊七政五天大號靈斗帝君南  
北建候東西均平光極中央臨照四方吾爲汝說玄文洞章世  
人受誦變災爲祥至士得之玄景靈光吾已爲汝說北斗本命  
之訣南斗六司之文度人無量劫劫長存吾今復爲汝說玉靈  
瑞篇東斗帝君之命主算延年使傳下世能度三塗五苦八難  
之厄能與削死上生大計之令總監形魂玄妙真默無極無窮  
老君曰東方之神以斗爲鄰長生大聖韓君丈人執我之柄不

死之神輔我之左長生之君弼我之右司馬大神行我之政司  
命司錄延壽益算無量度人青帝與我護魂太上與我扶身巴  
元醜伯魔王之眞從我所願延救天人急急如律令 咒曰

大道著明 寂默玄冥 五斗中運 四時生成

北都萬鬼 遏人年齡 我有洞章 度世長生

供養尊禮 主人精神 玄中有玄 峨峨玉京

急急如律令

東斗第一蒼靈延生眞君

東斗第二陵光護命眞君

東斗第三關天大衛集福眞君

東斗第四大明和陽保和真君

東斗第五尾極總監真君

老君曰凡人受誦必須至誠齋心東向叩齒心拜危坐閉目存神如見東方無極之鄉玄靈帝君至真大聖無鞅之眾羅列周匝如得監度有災之日宜於本命生辰或月之朔望月之九日或家庭觀宇以時花珍果焚香淨念望東斗帝君醮謝罪業求益壽年大靈所與獲福無量至人授度逍遙上清此經玄奧深不可詳

太上說經周竟於玉局座謂天師曰玄文秘法授非其人殃及九祖所以賜汝流行正道救度天人令得長生天師再拜頂禮

受之如法奉行自此傳於世矣



太上說西斗記名護身妙經

爾時太上老君降蜀都以永壽二年正月七日爲正一天師說東斗長生經竟復於是月十五日又降蜀都夜半靈景光照數千里平地如水有白玉高臺在空立之中老君隱几而坐詔正一天師而謂曰吾有立元大聖西斗真經乃上天所寶度人無量五天司會靈斗之君天人有命闕一不可吾又觀見眾生善惡功過增減死生無不厯關西斗大計之司較錄世人受度之名千屬命數無失毫分吾所以屢降授汝靈章惟此西斗大計帝君記人善惡書人功過吾今爲汝演說流傳世人使汝盡得五天之道天中之文五元之靈飛昇自然普度無窮也

老君告正一天師曰玄元無形窮極杳冥大象無爲五斗尊靈  
惟西方大帝主天之柄盛猛號令降魔至神典司內外伐戮之  
事搜索容隱邪鬼之形下記世人有善必錄有惡必記名號散  
殊生死之限常有八百千萬億輪轉周回照見三塗五苦十善  
九泉之境凡有去來必經方會之籍巨管琅篇校錄羣靈受度  
之名非此不行太玄有命西斗帝君吾見太靈府中謠歌洞文  
天之所寶祕莫得聞吾今以汝能尊奉大道復爲汝說西斗大  
計之經若能至誠尊敬轉相受誦身得玄籍琅篇書其功勤上  
聞諸天天部監授聞奏玄元玄元之上隨名度世名有善惡行  
有功過昭然不隱記於玄籍吾今授汝西斗靈音與世流行救

度幽冥至真之章普度無窮

老君曰天道常象西斗記名無寂無響立立上清太威真帝萬  
億神兵金鉞巨天孰敢留停殺伐斬滅魔靈妖精吾左有元榮  
右有立英招搖豐會統領魔形世人有命干及死生善惡根本  
如纏如縈飛天神王照吾光明符籍之上毫分叮囑我有洞章  
至聖元靈至人得之時至飛昇世人奉之通關元庭冥運真默  
大明明星急急如太上律令咒曰

虛明冲寂

以道爲根

上極無上

紫微帝君

真中有靈

立經正神

萬億神兵

森羅糾紛

昭朗威令

總領人身

巨明終始

太皇高真

急急如律令

西斗第一白標真君

西斗第二高元真君

西斗第三典皇靈真君

西斗第四將巨威真君

老君曰凡誦是經必須齋戒沐浴寂默正身西向而立叩齒數通至心望拜先念西斗大聖帝君二十一遍然後誦經凡有請告醮禳災禍必於本命之日或每月七日九日十五日嚴置壇場高及七尺低及七寸方濶九尺用通帛七尺爲幃書

大聖西斗帝君之字標於竿首或羅列珍寶或則種種香花置於壇上或在家庭或在觀宇於中夜中修設淨醮迎拜帝君所有奏請西望叩頭密誦真經無不應驗長善絕惡名記

諸天有聞靈音萬災不干斯經微妙無量度人

太上說經周竟重告天師曰西斗立與汝盡得之傳於下世勿輕其文信受奉行斷死續生吾於曜靈七萬年復與於此演說立極是時老君垂示經畢寂無遺聲若有若無不知所在天師受之傳於世矣





太上說中斗大魁保命妙經

爾時泰清仙境太上老君於永壽年中與徵士張真人屢慶會於蜀都以西斗靈文授之以其能修謹奉行於是

太上老君復現金身於清虛中昇玉局座敷宣正教而又垂言金鉞前戮巨天後冲降伏魔魅孰敢不從執籙把符玉女金童延生保命乘雲馭風生身受鍊度世無窮

老君是時乃宣咒曰

惟被中央 總領四方 提攝萬象 超卓紀綱

彰善罰惡 琅函玉章 漂落萬鬼 摧折鋒鋟

度世無量 名昭彼蒼 供養尊禮 掃除不祥

至心奉受 昇天朝翔 急急如律令

中斗第一赫靈度世真君

中斗第二幹化上聖真君

中斗第三冲和至德真君

太上曰凡人持誦是經切須齋心虔禮叩頭閉目一念存神人  
遊疊廓相見濟度救世延生能消除殃業滌蕩妖氛切切長存  
流行無疆

太上曰惟有中斗位居五天之中四方拱衛尊大無極主天元  
炁統領諸天祕文洞章天人所寶吾今告戒叮囑用傳下世濟  
度羣迷爲世津梁傳非其人若生忽慢天真不許繼世被殃吾

念汝能洗心澄慮嚴潔崇奉孜孜不倦終始一節確守素志可不爲汝陳敘說此中斗與章正一天師乃稽首作禮諦聽敬受老君告正一天師曰惟彼穹蒼位處中央端居靜密開列混茫四極輔翼大赫丕光七政璇璣兩曜伏襄統攝萬象提振紀綱嚴校諸天無極神鄉三官九署十二河源二十八宿三十二天普得擁護降福無殃蠲除罪簿落滅惡根東斗主算西斗記名北斗落死南斗上生中斗大魁巍然至尊天人受度曠劫長存三塗五苦八難三逆承茲正教昇入金門

老君謂正一天師曰中斗之炁生於四斗成始成終造化之源青帝護魂白帝侍魄赤帝養炁黑帝通血黃帝中主萬神無越

青天魔王巴元醜伯赤天魔王負天擔石白天魔王返山六目  
黑天魔王監醜朗馥黃天魔王橫天擔力五帝大魔萬神之宗  
總領鬼兵遏除羣凶旌幢寶仗嚴駕夔龍驅雷掣電周遊太空  
金鉞前戮四極歸真高尊之像冲靈帝君至尊大聖端拱圖列  
精神存想懇禱心願如得監度延生但依經法嚴奉供養於有  
災之日或於本命之日或於三元八會之辰鋪設淨壇以時果  
名花寶香供養宣告科儀清淨身心啟請真聖醺謝罪業真聖  
歡喜益算延年無願不從九祖生天名籍仙都逍遙上清  
老君告正一天師曰五方所祕靈音吾悉傳於下世濟度眾生  
永離沉淪爲世之寶功莫大焉

老君復告正一天師曰五斗符相靈文五斗真君名號宿有道緣方得值遇供養尊禮威烈靈驗善惡災祥應猶影響切在專心無得輕慢汝宜確守精專敬之戒之勿忘宣布

老君付囑訖乃昇天而去天師頂禮拜謝傳之於世藏之金匱化度無窮矣



太上說中斗大魁保命妙經